



A Eurocidade Chaves-Verín, AECT, foi galardoada co premio Excelencia en Turismo 2020 na categoría “PREMIO EXCELENCIAS BENESTAR”.

O xurado, formado por nove personalidades internacionais dentro dos ámbitos do turismo, a arte e a gastronomía, vén de seleccionar ao proxecto Eurocidade Chaves-Verín como destino de saúde e benestar na fronteira hispano-portuguesa pola súa capacidade de innovación, resiliencia e aposta pola saúde e benestar como bases da súa promoción turística conxunta. Unha aposta pola integración de recursos turísticos entre dous países en torno á auga mineral e termal, fomentando a alianza publico-privada, a promoción conxunta baixo a marca “dous países, un destino” e a creación de produtos turísticos sostibles como o Roteiro Termal e da auga e os Plans Biosaudables Verín- Chaves- Vidago.

Este premio será entregado o próximo 19 de maio non ámbito da Feira Internacional de Turismo (FITUR) en Madrid, que na súa edición 2021 que leva por título “Camión á recuperación”. No certame daranse cita personalidades destacadas da industria turística mundial, así como unha gran selección de prensa nacional e internacional acreditada; dando puntual relevancia e cobertura a esta entre de premios internacional.

O Grupo Excelencias

O Grupo Excelencias é unha multinacional do sector da comunicación fundado hai máis de 30 anos, liderando produtos e servizos de diferentes áreas do mundo da comunicación como: edición; multimedia e internet; axencias de publicidade e márketing; promocións; incentivos de vendas; agasallos de empresas e imaxe corporativa; axencia de comunicación e relacións públicas; organización de feiras internacionais, congresos e eventos; representacións turísticas; axencias de viaxes e artes gráficas.

É membro de CTO (Caribbean Tourism Organization) e de CHA (Caribbean Hotel Association), e forma parte dun acordo de colaboración coa UNESCO. As súas oficinas de representación radican en España, Cuba, México, Aruba, República Dominicana, Xamaica, Venezuela, Alemaña, Italia, Holanda, Panamá, Costa Rica e Brasil.

A multinacional creou os “Premios Excelencias” en 2005 co obxectivo de fomentar a excelencia en todos os ámbitos relacionados co turismo. Desde entón, convertéronse nun referente para todos aqueles que traballan día a día para lograr a excelencia non só nese ámbito, senón tamén na gastronomía, a cultura, ou a sustentabilidade.

No 2020 crearon unha nova categoría denominada “Premio Excelencias Benestar”, en que se galardoan aos proxectos que traballan no ámbito do wellness.